

Verbâl de Assemblee Gjenerâl Ordenarie dai 10 di Març dal 2019

Clamade adun cun letare dai 14 di Zenâr dal 2019, prot. nr. 38/19, daûr dal art. 8 come 2 dal Statût,

- in prime convocazion, sabide ai 9 di Març dal 2019, aes 11 sot sere;
 - in seconde convocazion, domenie ai 10 di Març dal 2019, a lis 9.30 di buinore;
- si è tignude a Udin, tal Salon d'Onôr "Guglielmo Pelizzo" di Palaç Mantica, in vie Manin 18, la Assemblee Gjenerâl Ordenarie de Societât Filologjiche Furlane, par discuti di chest ordin dal dì:

In session straordenarie:

1. Modifichis dal Statût de Societât Filologjiche Furlane;

In session ordenarie:

1. Esam, discussion e aprovazion dai documents di Belanç 2018;
2. Esam, discussion e aprovazion dai documents di Belanç di prevision 2019;
3. Elezion dai orghins sociâi;
4. Variis.

Al cjape la presidence de Assemblee il President de Societât Filologjiche Furlane, Federico Vicario.

Daûr dal art. 8, come 3 dal statût, stant che a la prime convocazion no si è presentât nissun, il President al declare costituite cun regolaritât in seconde convocazion la Assemblee Gjenerâl dai socis de Societât Filologjiche Furlane "Graziadio Isaia Ascoli".

Il President al propon Feliciano Medeot, Diretôr de Societât, tant che segretari verbalizant de Assemblee; la Assemblee e fâs buine la proposte.

Il President al domande a ducj i presints di rispietâ un moment di corot par ducj i socis che a son vignûts a mancjâ vie pal 2018 e tai prin mêis dal 2019.

Si passe duncje al exam dal ordin dal dì.

Session Straordenarie

Pont n. 1 dal ordin dal dì:

Modifichis dal Statût de Societât Filologjiche Furlane

Il President al riclame la necessitât di proviodi di cambiâ il Statût de Societât daûr di ce che al proviôt il Codîç dal Tierç Setôr (D.lgs. 117/2017).

Dut cas, considerant che cheste normative no je inmò completade parcè che a mancjin cetancj decreti ministeriâi di atuazion, il President al propon di rimandâ lis modifichis di Statût plui indenant, cuant che si varà cualchi indicazion plui sigure su la normative.

La proposte e van fate buine de Assemblee a la unanimitât.

Session Ordenarie

Pont n. 3 dal ordin dal di:

Elezion dai orghins sociâls (Consei Gjenerâl, Revisôrs, Probivîrs).

Il President al propon di tacâ daurman cu lis votazions te sale di consultazion de Biblioteche al plan tiere dal palaç e al propon ancje di nomenâ Denis Papais, Giulia Della Mora e Chippy Battello components de comission elettorâl pe elezion des carichis sociâls; al comuniche che lis operations di scrutini e la proclamazion dai elets a scomençaran a la fin de Assemblee Ordenarie dai Socis in udience publiche te stesse sale. Si fasarà il verbâl di dutis lis operations di vôt e di scrutini.

Lis propuestis a vegnin fatis buinis de assemblee a la unanimitât e lis operations di vôt a scomencin daurman.

Pont n. 1 dal ordin dal di:

Esam, discussion e aprovazion dai documents di Belanç 2018.

Il President al tache i lavôrs cu la leture de relazion morâl e, daspò, de relazion su lis ativitâts davueltis tal 2018. A conclusion, il President al passe la peraule al Tesorîr de Societât, Carlo del Torre, che al presente il rindicont di gjestion 2018 e il Stât Patrimoniâl ai 31.12.2018 de Societât, che al evidenzie un risultât economic de gjestion dal esercizi positîf par un impuart di 1.861,61 euro e al propon di puartâ chest impuart a riserve.

Al interven po il President dal Coleç dai Revisôrs dai Conts, Lorenzo Ronzani, che al lei la relazion che e esprim il parê positîf a la aprovazion dal Belanç 2018 di bande de Assemblee dai socis e a la propueste fate dai aministradôrs par meti a riserve il risultât di gjestion.

Ae fin de relazion e dai interventi, si passe a la votazion sul Belanç 2018 che al è fat bon a maiorange cu la uniche astension de socie Monica Tallone; e je fate buine ancje la propueste dai aministradôrs di destinâ il risultât positîf di gjestion 2018 a riserve, simpri a maiorange cu la uniche astension de socie Monica Tallone.

Pont n. 2 dal ordin dal di:

Esam, discussion e aprovazion dai documents di Belanç di prevision 2019.

Il President al presente a la Assemblee lis liniis di ativitât de Societât pal 2019 e al presente ancje il prospet dal Belanç preventîf pal 2019.

Si passe duncje a la votazion dal Belanç di prevision 2019 e dal Belanç trienâl 2019-2021, che a vegnin fatis bogns a maiorange cu la uniche astension de socie Monica Tallone.

Pont n. 4 dal ordin dal di:

Variis.

Il President, daspò des relazions, al passe la peraule ai socis.

A intervegnin:

- Adina Ruffini e domande sclariments sul comodât di Cjase Ascoli di Gurize e po e domande di incrementâ il numar des pagjinis des rivistis par furlan;
- Renzo Ciutto al propon di inmaneâ une rassegna pe promoziun dai libris scrits par furlan;
- Angelo Bertoia al domande cuâi che a son i rapuarts jenfri la Societât e l'ARLeF.

A ducj ju intervents al rispuint il President Vicario.

A vegnin ancje presentâts doi ordins dal dì:

- Pierino Donada, pe ratifiche de Cjarte europeane des lenghis regionâls e minoritariis di bande dal Parlament talian;
- Paolo Pastres, par ricognossi la comunitât furlane tant che comunitât di ereditât cemût che e proviôt la Convenzion di Faro e pe ratifiche de stesse di bande dal parlament talian.

Ju ordins dal dì a vegnin fats bogns ae unanimitât de Assemblee, che e incarghe la Presidence di inviâ ju ordins dal dì ai parlamentârs, ae region e ai orghins di stampe.

Al interven infin il vicepresidente Renzo Medeossi che al evidenzie la situazion di dificultât dal Gurizan in relazion a lis propuestis di riordin istituzionâl in discussion.

L'Assemblee a la unanimitât e rimande ai gnûfs organisims diretîfs l'aprofondiment de cuistion.

Il President al propon di sierâ lis votazions pes elezions dai orghins sociâls aes 12.30.

Stant che nol è altri ce discuti, la Assemblee si siere a lis 11.41.

Udin, ai 10 di Març dal 2019

Il segretari verbalizant
Feliciano Medeot